

ՀԱՅ ՄՇԱԿՈՒՅԹԻ ԱՆԽՈՎՋ ՀԵՏԱԶՈՏՈՂԸ

(Գառնիկ Ստեփանյանի ծննդյան 60-ամյակի առթիվ)

Գառնիկ Ստեփանյանն իր 60-ամյա կյանքի կեսից ավելին նվիրել է հայրենի մշակույթի ուսումնասիրության գործին և բազմաթիվ հմտալի հետազոտություններով լայն ճանաչում գտել թե հայրենիքում և թե Սփյուռքում:

Ընդարձակ են Գառնիկ Ստեփանյանի գիտական հետաքրքրությունների սահմանները. այն ընդգրկում է հայ հասարակական մտքի, գրականության և թատրոնի պատմության ընդգավառները, որոնցից յուրաքանչյուրում ունի իր նշանակալի ավանդը: Միջայն Նալբանդյանին, Արմենակ Հայկունուն, Հակոբ Պարոնյանին, Արփիար Արփարյանին, Պետրոս Աղամյանին, Արուսյակ Փափաղյանին, Մկրտիչ Զանաին նվիրված նրա մենագրությունները և ուսումնասիրությունները արժեքավոր ներդրումներ են նաև նոր գրականության և թատրոնի պատմության գիտական մշակման գործում: Գ. Ստեփանյանի գրչին է պատկանում «Հայ նոր դրականության պատմության» բազմահատորյակի երկրորդ հատորի ծավալուն ներածությունը («Հայ հասարակական կյանքը, կուլտուրան և գրականությունը XIX դարի 50—60-ական թվականներին»):

Առանձնակի հիշատակության արժանի է նրա «Ուրվագիծ արևմտահայ թատրոնի պատմության» եռհատոր աշխատությունը, որի առաջին հատորը հրատարակվել է 1962-ին, երկրորդը շուտով լույս կտեսնի, իսկ երրորդը պատրաստվում է տպագրության: Այս ծանրակշիռ գործը, ինչպես նաև նրա եռահատոր «Կենսագրական բառարանը» (որի առաջին հատորն արդեն տպագրության է հանձնված) իրավամբ կարելի է դասել վերջին տարիների մեր գիտական կյանքի ակնառու երևույթների շարքը:

Գ. Ստեփանյանի առաջաբաններով են լույս տեսել արևմտահայ մի շարք արձակագիրների (Արփիար Արփարյան, Ջապել Նսալյան, Տիգրան Կամսարական, Նրուխան) երկերի մասսայական հրատարակությունները:

Հատկապես նշանակալի է Գ. Ստեփանյանի գերը Հակոբ Պարոնյանի երկերի գիտական հրատարակության և ուսումնասիրության ասպարեզում: Նա է նշխարավոր մեր մեծագույն երգի-ծափերի կյանքին և ստեղծագործությանը նվիրված ծավալուն մենագրության, որի միայն առաջին հատորն է հրատարակվել («Պարոնյանի կյանքը և հրապարակախոսությունը»): Գ. Ստեփանյանի զլխավոր խմբագրությամբ է իրականացվում Հակոբ Պարոնյանի երկերի գիտական հրատարակությունը 11 հատորով (լույս են տեսել 1—6 հատորները, 7-րդը տպագրվում է): Արդասավոր են եղել Գ. Ստեփանյանի գործունեության տարիները Մ. Արեղյանի անվան գրականության ինստիտուտում և՛ գրականության և՛ արվեստի թանգարանում: Լինելով վերջինիս ղեկավարը (1954—1963 թթ.), մեր հոգևոր մշակույթի այդ զանազան հարստացրեց հայ գրականության և արվեստի պատմության համար կարևորագույն նշանակություն ունեցող մեծաքանակ վավերագրերով և հազվագյուտ հրատարակություններով:

Նույնքան արդյունավետ է եղել Գ. Ստեփանյանի գործունեությունը Հայաստանի գիտությունների ակադեմիայի «Տեղեկագրի» (հաս. գիտություններ) խմբագրությունում, ուր վարել է նախ պատասխանատու քարտուղարի (1948—1952 թթ.) և ապա խմբագրի (1953—1956 թթ.) պաշտոնները: Ամենուրեք Գ. Ստեփանյանն աչքի է ընկել բացառիկ աշխատասիրությամբ, գիտական բարեխղճությամբ և խանդավառ նվիրվածությամբ՝ հանուն հայ մշակույթի և գիտության դարգացման:

Այդ բարձր հատկանիշները, որոնցով բնութագրվում է Գ. Ստեփանյանն իր ամբողջ գործունեության ընթացքում, լավագույն երաշխիքն են գիտական նոր արժեքների, որ նրանից սպասում է մեր գիտական հասարականությունը՝ առաջիկա տասնամյակներին:

Ա. ԻՆՆՈՎՅԱՆ